



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 2131 vum honorabelen Deputéierte Fred Keup**

Fir d'éischt sief preziséiert, datt sämtlech ënne genannten Zuelen sech op d'Rentrée vum Schouljoer 2024-2025 bezéien.

**Ad 1)**

36 Kanner a Jonker vu Rédange (F) ware fir d'Rentrée 2024-2025 a Schoulen zu Lëtzebuerg ageschriwwen, 24 dovun an enger europäescher oder internationaler Schoul.

**Ad 2)**

D'Sozialisatioun vun de Kanner an hir Integratioun an d'Communautéit vun der Gemeng kënnen schonn an der fréier Kandheet ugesat ginn a si net ausschliisslech un d'Schoul gebonnen. Eng Gemeng kann, duerch eng entspreichend an op Kanner ausgerichte Offer un Aktivitéiten, scho fréi dozou bäidroen, datt tëscht hire jéngste Bierger e Gefill vun Zesummenhalt an Zesummegehéieren entsteet. Natierlech spillt och d'Schoul an deem Kontext eng net onweesentlech Roll, mee d'Verknëppung a Vernetze vun de Kanner geschitt zu engem groussen Deel ausserhalb vun der formaler Bildung.

D'Tatsaach, datt eng gewëssen Zuel vu Kanner a Jonken, déi zu Lëtzebuerg beschoult ginn, hire Wunnsëtz am Ausland hunn, hänkt sécherlech mat der héijer Zuel vu Frontalieren zesummen, déi all Dag op Lëtzebuerg schaffe kommen, grad ewéi och mat der Zuel vu Lëtzebuerger Familljen, déi hire Wunnsëtz am noen Ausland hunn. Donieft dierf een och d'Tatsaach net aus den Ae verléieren, datt eng ganz Rei vu Schüler mat Wunnsëtz zu Lëtzebuerg hir Schoul am Ausland maachen.

**Ad 3) a 4)**

Insgesamt hunn 2775 Kanner a Jonker, déi zu Lëtzebuerg an d'Schoul ginn, hire Wunnsëtz am Ausland; den Tableau hei drënner weist déi genee Opdeelung.

		Wunnsëtz D	Wunnsëtz B	Wunnsëtz F	Total
<b>Ens. fondamental</b>		121	107	252	<b>480</b>
<b>Ens. secondaire</b>	international	12	5	22	<b>39</b>
	europäesch	66	59	243	<b>368</b>
	national öffentl.	946	227	646	<b>1.819</b>
	national privat	21	10	38	<b>69</b>
<b>Total</b>		<b>1.166</b>	<b>408</b>	<b>1.201</b>	<b>2.775</b>

**Ad 5)**

Eng Äntwert op dës Fro ass net méiglech, well bei der Aschreiwung de Lieu de travail vun den Elteren net erfaasst gëtt.

Lëtzebuerg, den 29. Abrëll 2025

De Minister fir Educatioun,  
Kanner a Jugend

(s.) Claude MEISCH